

Cultura e turism va amò a pe zot

La radunanza de l'Istitut Cultural Ladin à metù al luster la potenzialitèdes de strumenc cultural amò massa pech desfrutè da la comunanza e dal setor economic e turistic

Cultura - L'è vegnù fora lumes e ombries, te l'ultima radunanza de l'Istitut Ladin. Anter la prumes la sodesfazion palesèda dal president Antone Pollam per la neva seziun didatica del Segat averta a Poza, per l'prestigious pest Gambrinus ciapà dal liber "Guant" e percheche zacan se à podù envièr via l cors de auta formazion Antropolad: "se sion bogn de l far jir inant tel temp - à dit l diretor Fabio Chiocchetti - chesta l'è na picola università ladina".

Sodesfazioni rua enee dal liber di vijitadores del Museo, con comenc entusiastics che fèsc entener l'importanza de chesta strutura per sporjer vèlch de calità e valorisèr l'identità de noscia val. Pecià che chesta emportanza sie amò massa pech entenuda da noscia jent e dai ambienc economics e turistics.

Chesta la maor ombria, che à abù gran lèrga tel debatit. Da l'enrescida de la TSM prejentèda da pech da l'APT vegn fora che la cultura ladina no l'è un di elemenc più atratives per nesc ghesé, à dit Annalisa Zorzi. Ampò (o fosc l'è apontin chesta na rejon) endèna che se reiona de slongèr la sajons del turism, ti pachec da d'uton te Fascia troa lèrga la termes e la magnadiva, ma la cultura ladina nia del dut. Dut chest a despet de LadinHotel e de duc i convegnos su identità e turism.

De l'emportanza del raport anter turism e identità à rejonà enee la Procuradora Elena Testor; l'ombolt de Vich Leopoldo Rizzi à sottrissà l'empegn per la cultura e paroles de ringraziament per l lurier fat da l'Istitut é ruèdes da la Sorastanta Mirella Florian e dal president de l'Union di Ladins Fernando Brunel.

"Aon de besegn che i amistradores e i operadores economics crese tel Museo - l'è dit Chiocchetti - chest an di 6000 euro che aane a la leta per la promozion n'è restà demò 3000. Bastassa che l'1% de chi che rua te Fascia vegne a veder l Museo, enveze noi n auter an de mé cognaron tegnir sarà al public perché no podon più se permeter na persona demò per tegnir avert." Endèna l'è prejentà enee



L president Antone Pollam e l diretor Fabio Chiocchetti endèna la radunanza de l'Istitut Ladin.

l gran projet per fèr de la Mostra su la Gran Vera de Moena n Museo e Parch de la memoria de Fascia, che se spera l vegne tout sù e portà inant.

N segn de atenzion é ruà te chest temp da Nadèl da la Pro Loco de Vich, che à cernù Sèn Jan per fèr so picol marcià da Nadèl, con esposizioni e ativitèdes enee te l'Istitut e te Museo. N picol vèrch che - à dit l president e l diretor de l'ICL - se spera che l posse crescer amò con l nef Comun de Sèn Jan.

L'è colpa de noi hotelieres se no sion bogn de far cognoscer l Museo, à dit Stefano Weiss: la maor part no i é nience mai pesté ite. Tedò l guant, ma enee tedò l lengaz, te dut che che vegn sport - l'è jontà Lodovida Dioli - cogn esser più cultura: da Pèscia Tofèna te Piaz cogn esser i Trei Rees, no la Befana. E segur enee ai ghesé - à dit amò zachei - ge saessa bel e curious poder troèr te le hall di hotè, te stazion de na forenada e ti lesc olache i se ferma a spetèr, na postazion da olache i podessa curchèr te la "Mediateca ladina": chest strumenc multimedièl é stat prejentà tel cors de la radunanza da Fabio Chiocchetti e da Carlo Zoli, che à realisà la pèrt tecnica.

La Mediateca ladina

Bèsta jir sun n motor de enrescida e scriver ite "mediateca ladina" e se aur n armer de produzioni ladines:



L diretor Chiocchetti à prejentà ensema con Carlo Zoli la Mediateca ladina.

se pel veder video e filmac, vardèr la piates de libes e endèna sentir la letura e veder evidenzià la paroles e amò scutèr la oujes originèles de personaj desche Simon de Giulio, Giochele Stochier, Ermanno Badia o Giovanni Cechinol. La seziun "strumenc", fata en colaborazion con l'Olfed, é pissèda per la didatica e la permet enee de fèr egercizies e desciarièr i pdf. Te chest "armer" se pel jontèr ite d'ò e d'ò neves prodoc, ma enee fèr comedamenc e integrazions zenza cogner fèr restampes. N strumenc che à soscedà la marevea di prejent, utol per i insegnanc ma enee per duc i operadores cultural e chi che vel cognoscer lengaz e cultura ladina, e magari enee ge la fèr cognoscer ai etres. L'Istitut podessa cosci se dedichèr a duta l'autra ativitèdes, desche l dizionèr VolE, la publicazion, i servijes educatives te Museo e l'enrescida. Fossa besegn de jent - à dit Cesare Bernard - per meter man a duc i materiali che speta amò de vegnir luré fora. Vèlch de interessant de chest vers se pel l veder tel nef numer de Mondo Ladino, olache se troa enee contribuc de enrescida di joegn Armin Chiocchetti, Martina Volcan e Nives lori. L numer 41 de la revista ge é stat sport a duc chi che é rué a la radunanza, ensema con l Calandèr Ladin 2018, che é stat prejentà subito d'ò la radunanza te la Ciasa de Paussa de Fascia. (lg)